



PRENTSAURREKOA

MATRIKULA GARAIAN, PUBLIKOAREN ALDE

Atarian dugu 2023-24 ikasturterako umeen matrikula egiteko epea, ikastetxea aukeratzeko garaia, alegia.

Prentsaurreko honek bi helburu ditu: ikasleen onarpen prozesu berriaz gure kezka adierazi, eta gurasoak animatu beren umeak eskola publikoan matrikula ditzaten.

ONARPEN DEKRETUA ETA AGINDUAK

Aurten araudia aldatu dute baina irakaskuntza pribatu-itunduaren aldeko planifikazioan oinarrituta jarraituko du matrikulazio prozesuak, hezkuntza itunak blindatu baitituzte. Bestalde, zonifikazio berriak, zonalde handiagoekin, ikastetxeen arteko lehia sustatzen du eta ikastetxe ahulenak arriskuan ipintzen ditu, horietako gehienak publikoak.

Hezkuntza Saila lau haizetara goraiatzen ari den berrikuntzak, gehienez jota, egoera zaugarrian dauden ikasle multzo bat, orain arte ikastetxe publikoetan matrikulatzen zena, ikastetxe pribatu-itunduetara bideratuko du, aldi berean diru eta baliabide gehiago ikastetxe horiei emango dielarik. Begi bistan dago horrek sistemaren privatizazioa areagotuko duela.

Gainera, sare publikoa ahultzeak, D eredu ahultzea ekarriko du hainbat ikasle itunpeko A edo B ereduko ikastetxeetara bideratuko direlako, euskararen kaltetan.

- Ikasleak banatzea: araudi berriak ikastetxe guztiek berariazko premiak dituzten ikasle-portzentaje bat hartu beharko dutela dio. Azkenean, Jaurlaritzak onartu behar izan du gizarte-justiziako arazo bat dagoela, segregazioa alegia, urteetan ez ikusiarena egin ondoren; baina arazoaren kausari aurre egin beharrean, sintomari baino ez dio heltzen. Sintoma da ikasleen banaketa onartezina bi sareetan, eta horren kausa irakaskuntza pribatu-itunduaren presentzia izugarria, ituntze-maila ia erabatekoa, eta bere praktika txarren gaineko kontrol falta.

Kontua ez da mota bateko edo besteko ikasleak banatzea, horrek dakarren estigmatizazio arriskuarekin eta egungo eredu duala blindatzen jarraituz, baizik eta eskola publikoen sare orekatu eta indartsu bat eraikitzea.

- Eskola plaza pribatu-itunduen gaineskaitza dago: Onarpen Dekretuan, Hezkuntza Sailak eskola-plazen gaineskaitza saihesteko asmoa adierazi bazuen ere, ondorengo aginduaren arabera pribatuaren eskaintza osoa mantendu du.

Horrek zuzenean kaltetu eta murriztuko du sare publikoa, plaza publiko berriak sortu beharrean, itunpeko sareari nahi adina hazten utzi zaiolako.

Benetan sinistuko balute eskola publikoak lehentasuna behar duela, ikasleen onarpena zonaldeko, auzoko edo herriko eskaintza publikoak egiten duen gela arabera egin beharko litzateke, eskola-plazen eskaintzaren planifikazio arrazionalaren ondorio logiko gisa hezkuntza-itunak pixkanaka murriztuz, eskolatzeko orekatua lortuz eta ume guztien eskubideak bermatuz.

3. Ikasleak egunero garraioan, praktika jasangaitza: araudi berriaren baremoan hurbiltasunak garrantzia izan arren, bai pribatu-itunduko eskola-plazen gehiegizko eskaintza mantentzeak nola zonaldeak handitu izanak umeen mugikortasuna bultzatzen dute.

EGIN DEZAGUN PUBLIKOAREN ALDE, GURE ESKOLAREN ALDE!

Hezkuntza Lege berriaren zirriborroak sare publikoa eta pribatua berdindu nahi ditu "Euskal Hezkuntza Zerbitzu Publikoa" delako batean, biak maila berean jarri. Berdinak izango balira bezala, finantzazio berbera izango lukete titularitatea bazter utzita. Hau da, jaiotza-tasa behera egiten ari den honetan, sare publikoa sendotu beharrean hegemonikoa izatera iritsi arte, eta pribatuarekiko itunak behar-beharrezkoa dena mugatu beharrean, berau babestu eta mantendu egiten du. Onartezina da.

Euskal Eskola Publikoaz Harro Topaguneko kideok argi dugu. Apustu sendoa egiten dugu eskola publikoaren alde. Eta zalantzan dabilzan familiei eta baita gizarte osoari ere, hezkuntza publikoaz harro egoteko arrazoiak helarazi nahi dizkiegu:

Harro gaude unibertsala delako: herritar guztientzat irekia eta doako den bakarra. Euskalduna delako: gaurko eta etorkizuneko euskaldunak hezten. Anitza delako: ezberdinen arteko elkarbizitza aberatsa egunero biziz ikasten delako. Kalitatezkoa delako. Inklusiboa delako: denona da, eta denontzat, inor atzean uzten ez duen eskola. Herritarra eta parte hartzailea delako, gurea, komunitate osoarena familia, ikasle, irakasle, eta langileena. Jasangarria delako: etxe ondoan egonik ingurunearekin guztiz bat egiten duelako, herri eta auzoak bizitaz betetzen. Langileak kontratatzean berdintasuna, meritu eta gaitasuna dituelako irizpide.

Osasuna, zaintza, pentsioak, hezkuntza... zerbitzu publiko horien guztien kalitateak jendarte baten ongizate maila adierazten du. Euskal Herri osoan, eta Euskal Autonomia Erkidegoan ere, horietatik dira defendatu behar ditugunak, Hezkuntzan, Eskola Publikoa.

EUSKAL ESKOLA PUBLIKOAN ELKARTUKO GARA: ZATOZ GUREKIN!

EUSKAL ESKOLA PUBLIKOAZ HARRO TOPAGUNEA

Gasteizko, Oiongo, Bilboko, Santurtziko, Oarsoaldeako, Astigarragako, Donostialdeko, Aiztondoko, Lasarte-Oriako plataformak; Ordiziako Euskal Eskola Publikoko Komunitateak, Amurrioko Hezkuntza Publikoaren Sarea eta Debagoieneko Goieskola; EHIGE, HEIZE, Ikasle Sindikatua, Ikasle Abertzaleak, Ikama, Ikasle Ekintza, Gazte Komunistak, STEILAS, CCOO Irakaskuntza, ESK